

ԱՉԴԱՐԱՐ

ՏԵՐԵԿԱՏՈՒ ԱՌԱՋՆՈՐԴԱՐԱՆԻ ՀԱՅՈՑ ՔՈՒԷՅԹԻ ԵՒ ԱՐԱՐԱԿԱՆ ԾՈՑԻ ԵՐԿԻՐՆԵՐՈՒ ԹԵՄԻՆ
P.O.Box: 8157, Salmiyeh 22052- Kuwait. Tel: 965-25614392, Fax: 965-25638312, e-mail: q8church@yahoo.com

ՆՈՐ ՇՐՋԱՆ, 2. Տարի, Թիւ 221, Ուրբաթ, 07 ՄԱՐՏ, 2014

ՀԱՄԱՅՆՔԱՅԻՆ

ՀԱՆԴԻՊՈՒՄ ՊԱՊԱԿԱՆ ՆՈՒԻՐԱԿԻՆ ՀԵՏ

Հինգշաբթի, 6 Մարտ 2014ի առաւօտուն, Թեմիս Կաթողիկոսական Փոխանորդ Գերպ. Տէր Մասիս Ծ. Վրդ. Զօպույեան, ընկերակցութեամբ Ազգային Վարչութեան ատենապետ Պրն. Վարդան Նարինեանի եւ Յարաբերական Յանձնախումբի ատենապետ Պրն. Մարքօ Պապլանեանի, հանդիպում մը ունեցաւ Քուէյթի եւ Արաբական Ծոցի երկիրներու Պապական Նուիրակ Պիթար Ռիչ Արքեպիսկոպոսին հետ, Վատիկանի դեսպանատան մէջ:



Գերպ. Հայր Սորբը իր խօսքին մէջ անդրադարձաւ Քուէյթի հայկական գաղութի եկեղեցական, կրթական, մշակութային եւ զանազան բնագաւառներու մէջ տանող աշխատանքներուն մասին: Հայր Սուրբը նաեւ անդրադարձաւ Մեծի Տանն Կիլիկիոյ Կաթողիկոսութեան եւ Վատիկանի հետ միջ-եկեղեցական գործակցութեան եւ պատմական կապերուն մասին:

Իր հերթին Պապական Նուիրակը ողջունեց պատուիրակութեան այցը եւ կարեւորեց եկեղեցիներու միջեւ գործակցութեան անհրաժեշտութիւնը:

ՀԱՆԴԻՊՈՒՄ ՇԷՅԽԱ ՀԱՄԱՅՆՔԻ ՀԵՏ

Չորեքշաբթի, 5 Մարտ 2014-ին Թեմիս Կաթողիկոսական Փոխանորդ Գերպ. Տ. Մասիս Ծ. Վրդ. Զօպույեան, ինչպէս նաեւ Ազգային Վարչութեան անդամներ Տիարք՝ Վարդան Նարինեան եւ Ռաֆֆի Յովսէփեան, հանդիպում մը ունեցան Քուէյթի Էմիրի Հարսին՝ «Իսլամական Մշակոյթի տան» (دار الأثر الإسلامية) ընդհ. պատասխանատու, Շէյխա Հասսա Ալ Սալէմ Ալ Սապահի հետ:




Հանդիպումը անցաւ ջերմ մթնոլորտի մը մէջ, որուն ընթացքին Հայր Սուրբը անդրադարձաւ Քուէյթի հայ համայնքի պատմութեան, իսկ Շէյխայի հարցումներուն ընդառաջելով, Հայր Սուրբը լուսաբանական տեղեկութիւններ փոխանցեց Հայ Եկեղեցոյ պատմութեան կարեւոր հանգրուաններուն մասին: Ան կարեւորութեամբ անդրադարձաւ Մեծի Տանն Կիլիկիոյ

Կաթողիկոսության եւ անոր գահակալ Ն.Ս.Օ.Տ.Տ. Արամ Ա. Հայրապետի իսլամ-քրիստոնեայ երկխոսության տուած իրայատուկ կարեւորութեան: Իսկ Շէյխան, անդրադառնալով Քուէյթի հայ համայնքին մասին ըսաւ, որ անոնց ներկայութիւնը միշտ եղած է դրական: Այնուհետեւ Շէյխան համապարփակ տեղեկութիւն տուաւ իր վարած հաստատութեան մասին, որ տարբեր կրօններ եւ մշակոյթներ զիրար մերձեցնել կը միտի: Հանդիպումէն ետք պատուիրակութիւնը այցելեց նոյն հաստատութեան պատկանող թանգարանը, որուն մէջ ցուցադրուած են իսլամի պատմութեան թանկարժէք իրեր:



ՊԱՇՏՕՆԱԿԱՆ ԱՅՑԵԼՈՒԹԻՒՆ ՔՈՒԷՅԹԻ ՄՕՏ ՊԱՀՐԷՅՆԻ ԴԵՍՊԱՆՈՒԹԻՒՆ

Երեքշաբթի, 4 Մարտ 2014-ին, առաւօտուն Թեմիս Կաթողիկոսական Փոխանորդ Գերայ. Տէր Մասիս Ծ. Վրդ. Զօպուլեան, ընկերակցութեամբ Ազգային Վարչութեան ներկայացուցիչներ՝ պարոնայք Վարդան Նարինեանի եւ Ռաֆֆի Յովսէփեանի, այցելեց Քուէյթի մօտ Պահրէյնի դեսպանատուն եւ պաշտօնական հանդիպում մը ունեցաւ դեսպան Շէյխ Խալիֆա Իպն Համատ Ալ Խալիֆայի հետ:



Գերայ. Հայր Սուրբը առաջին հերթին, յանուն քուէյթի հայ համայնքին, խորին ցաւակցութիւններ յայտնեց դեսպանին, Երկուշաբթի, 3 Մարտ 2014ին Պահրէյնի մէջ տեղի ունեցած պայթումին հետեւանքով զոհ գացած հոգիներուն համար:

Այնուհետեւ Հայր Սուրբը նշեց, որ Պահրէյնի մէջ գոյութիւն ունի հայկական փոքրիկ համայնք մը, որ կը վայելէ Քուէյթի Ազգային Առաջնորդարանի խնամքը:

Դեսպան Շէյխ Խալիֆան ուրախութեամբ ողջունեց հայկական պատուիրակութիւնը: Ան մօտէն ծանօթ ըլլալով Մեծի Տանն Կիլիկիոյ Կաթողիկոսութեան, բարձրօրէն գնահատեց Սուրբ Աթոռի եւ անոր գահակալ Ն.Ս.Օ.Տ.Տ. Արամ Ա.ի միջ-կրօնական եւ մանաւանդ իսլամ-քրիստոնեայ փոխյարաբերութեանց ոլորտին մէջ տարած աշխատանքները:

**Սրբոց Վարդանանց եկեղեցւոյ
ՄԱՐՏ ամսուան Մումի բարերարն է
Յարգելի Ազգային մը:**

ՀԱՅԿԱԿԱՆ

**Նախագահ Սարգսեան Պիտի Մասնակցի Եւրոպական
Ժողովրդական Կուսակցութեան Լիագումար
Նստաշրջանին**

Հայաստանի Հանրապետութեան նախագահի աշխատակազմի տեղեկատուութեան միջոցներու հետ կապերու վարչութիւնը տեղեկացուց, որ նախագահ Սերժ Սարգսեան այսօր աշխատանքային այցելութեամբ պիտի մեկնի Իրլանտա՝ մասնակցելու Տապլինի մէջ կայանալիք Եւրոպական ժողովրդական կուսակցութեան լիագումար նստաշրջանին, ուր ելոյթ պիտի ունենայ:

**Քոնկրետականներ Շիֆ Եւ Սիսիլյան Դատապարտեցին
Սումկայիթի Ջարդերը Եւ Սատարեցին Արցախի
Անկախութեան**

Միացեալ Նահանգներու քոնկրետականներ Էտրմ Շիֆ Եւ Տէվլիտ Սիսիլյան խստի դատապարտած են ազրպէյճանական իշխանութիւններու կազմակերպած կոտորածները Սումկայիթի, Պաքուի եւ Կիրովապատի մէջ եւ սատար հանդիսացած են Արցախի ժողովուրդի ինքնորոշման ժողովրդավարական իրաւունքին: «Սումկայիթի ջարդերը պատմութեան սել կէտն են, եւ ցաւալիօրէն այս իրադարձութիւնները վերածուեցան նոր բռնութիւններու, երբ 9 ամիս անց նշանակէտին վրայ յայտնուեցան Կիրովապատի հայերը, ապա Պաքուի մէջ՝ 1990 թուականին», անցնող շաբաթ իր խօսքին մէջ ըսած է քոնկրետական Սիսիլյան, ինչպէս «Արմենփրես»-ին տեղեկացուց Միացեալ Նահանգներու Հայ դատի յանձնախումբը:



«Ձեւաւորման առաջին իսկ օրերէն (Արցախի) հանրապետութեան՝ ազատ կամքով ընտրուած կառավարական մարմինները օգնած են ստեղծել բաց ժողովրդավար հասարակութիւն թափանցիկ ընտրութիւններու միջոցով, եւ շատ կարեւոր է, որ Միացեալ Նահանգները սատարեն անոնց անկախութեան եւ ինքնավարութեան», աւելցուցած քոնկրետականը:

Յայտարարութիւն կատարած է նաեւ քոնկրետական Էտրմ Շիֆ: «Այս սարսափելի գործողութիւններով ազրպէյճանական պետութիւնը յիշեցուց ամբողջ աշխարհին, թէ ինչու պէտք է թոյլ տալ Արցախի ժողովուրդին ինքնորոշոյն որոշել իր ապագան եւ ինչու՝ անիկա չի կրնար իյնալ Ալիեւի ճանկերուն մէջ, որպէսզի 26 տարի առաջ տեղի ունեցած Սումկայիթի կոտորածները աւելի մեծ սպանդի նախանշան չհանդիսանան», նշեց Շիֆ՝ ընդգծելով, որ Սումկայիթի զոհերու յիշատակը պէտք չէ մոռցուի, եւ իրենց բարոյական պարտականութիւնն է քննադատել այսպիսի ոճիրները պատմութեան կրկնութենէն խուսափելու համար:

Միացեալ Նահանգներու Ներկայացուցիչներու տան արտաքին հարցերու յանձնախումբի նախագահ Էտ Ռոյս, քոնկրետականներ Պրետ Շերման, Թոնի Կարտենաս, Աննա Էշու եւ Քէթրին Քլարք նոյնպէս ոգեկոչած եւ յարգած էին Սումկայիթի, Կիրովապատի եւ Պաքուի ջարդերու զոհերուն յիշատակը՝ կոչ ուղղելով Ազրպէյճանին դադարեցնելու յարձակումը Հայաստանի եւ Լեռնային Ղարաբաղի դէմ:

Նախագահ Սարգսեանի Անունով Ծաղկեպսակ՝ Վազգէն Սարգսեանի Շիրիմին

Պետական, քաղաքական գործիչ, Հայաստանի ազգային հերոս եւ Հայաստանի նախկին վարչապետ Վազգէն Սարգսեանի ծննդեան 55-ամեակին առիթով Հայաստանի Հանրապետութեան նախագահ Սերժ Սարգսեանի անունով երէկ Եռաբլուր պանթէոնին մէջ ծաղկեպսակ զետեղուեցաւ Վազգէն Սարգսեանի շիրիմին, կը փոխանցէ Հայաստանի նախագահի աշխատակազմի հասարակայնութեան եւ տեղեկատուութեան միջոցներու հետ կապերու վարչութիւնը:

ԵԱՀԿ-ի Մինսքի Խմբակը Շուէտի Մէջ Խորհրդակցութիւններ Կը Կատարէ

ԵԱՀԿ-ի Մինսքի Խմբակի ամերիկացի համանախագահ Ճէյմս Ուորլիք «Թուիթըր»-ի իր էջին վրայ գրած է, որ ԵԱՀԿ-ի Մինսքի Խմբակը Շուէտի մէջ խորհրդակցութիւններ կը կատարէ կառավարութեան հետ:

Ան նշած է, որ երէկ հասած է Սթոքհոլմ, ուր պիտի կայանան քննարկումները:

Նշենք, որ Պաքուին «հաճելի չէ եկած» Ուորլիքի՝ նախապէս «Թուիթըր»-ի վրայ տեղադրած հետեւեալ գրութիւնը. «Մենք եւս կը յիշենք Սումկայիթը: Ե՛ւ Հայաստան, ե՛ւ Ազրպէյճան պէտք է նպաստեն հանդուրժողականութեան եւ վստահութեան զարգացման ծրագիրներուն»:

ԱՓԱ կը հաղորդէ, որ Ազրպէյճանի արտաքին գործոց նախարարութեան մէջ չեն վարանած մեկնաբանել Ուորլիքի կարծես թէ «անվնաս» գրառումը:

Ազրպէյճանի արտաքին գործոց փոխնախարար Արագ Ազիմով յայտնած է. «Սումկայիթեան իրադարձութիւնները տեղի ունեցած են, սակայն անոնց պատճառները, պայմանները, եւ ընդհանուր առմամբ իրողութիւնը ամբողջովին այլ բնոյթի են»:

Ազիմով յայտարարած է, որ Ուորլիք նաեւ «Թուիթըր»-ի վրայ իր կարծիքը յայտնած է այսպէս կոչուած «Խոջալուի ցեղասպանութեան» վերաբերեալ՝ նշելով, որ «Թուիթըր»-ը Խոջալուի քննարկման տեղը չէ:

Ուորլիք գրած է. «Խոջալուի ողբերգութեան տարելիցին օրը մենք կը յիշեցնենք, որ բռնութիւնը լուծում չէ: Բոլոր կողմերը պէտք է ջանադրաբար աշխատին խաղաղութեան հասնելու համար»:

Ազիմով ըսած է. «Ես չեմ կրնար այս ամէնը ըսել պարոն Ուորլիքին «Թուիթըր»-ի վրայ, որովհետեւ այնտեղ կարելի է ընդամենը 120 տառերէ բաղկացած ուղերձ զետեղել: Պարոն Ուորլիքը վերջերս նշանակուած է այդ պաշտօնին մէջ եւ պէտք է աւելի լաւ ծանօթանայ տագնապին իրողութիւններուն»:

Յայտնենք, որ նախապէս ԵԱՀԿ-ի Մինսքի Խմբակի համանախագահները յայտարարած էին, որ մտադիր են շարունակել Լեռնային Ղարաբաղի տագնապի լուծման ուղղուած աշխատանքները:

Ռուս համանախագահ Իկոր Փոփով ազրպէյճանական ԱՓԱ լրատուական գործակալութեան յայտնած էր, որ տագնապի կողմերուն մօտ կը նկատուի առաջ երթալու տրամադրութիւն:

Հայաստան Վերադարձուցաւ Գերեվարուած Ծերունի Մամիկոն Խոջոյեան

«Երէկ հայաստանցի քաղաքային անձը, որ գերեվարուած էր Պաքուի մէջ, վերադարձուցաւ Հայաստան՝ Կարմիր Խաչի միջազգային կոմիտէի (ԿԽՄԿ) հովանիին ներքեւ: Քաղաքացին յանձնուցաւ հայաստանցի պաշտօնէաներու խնամքին ազրպէյճանական Ղազախ եւ հայկական Իջեւան քաղաքներուն միջեւ անցնող ճամբուն՝ միջազգային սահմանին վրայ», ըսուած է Կարմիր Խաչի միջազգային կոմիտէի երէկ տարածած հաղորդագրութեան մէջ:

Ըստ հաղորդագրութեան, կոմիտէի պատուիրակները այցելած են քաղաքացիին նախքան անոր վերադարձը՝ բանտարկութեան պայմանները եւ անոր նկատմամբ վերաբերմունքը գնահատելու համար: Կազմակերպութեան ներկայացուցիչները նաեւ կապ պահած են Հայաստանի մէջ անոր ընտանիքին հետ:

Վերադարձուած քաղաքացին 77-ամեայ Մամիկոն Խոջոյեանն է:

«Գործելով իբրեւ չէզոք միջնորդ եւ իր յանձնագիրին համաձայն, Կարմիր Խաչի միջազգային կոմիտէն աջակցած է քաղաքացիին վերադարձին՝ գործելով Ազրպէյճանի Հանրապետութեան եւ Հայաստանի Հանրապետութեան իշխանութիւններուն հետ միասին», նշուած է Կարմիր Խաչի միջազգային կոմիտէի հաղորդագրութեան մէջ:

Արցախ. Նախագահ Սահակեան Ընդունեց Հայաստանի Կրթութեան Եւ Գիտութեան Նախարարը



Լեռնային Ղարաբաղի նախագահ Բակօ Սահակեան երէկ ընդունեց Հայաստանի կրթութեան եւ գիտութեան նախարար Արմէն Աշոտեանը:

Լեռնային Ղարաբաղի նախագահին պաշտօնական կայքը հաղորդեց, որ հանդիպումին, որուն մասնակցեցան Լեռնային Ղարաբաղի

փոխվարչապետ Արթուր Աղաբեկեան եւ կրթութեան ու գիտութեան նախարար Մլաւա Ասրեան, քննարկուեցան Արցախի մէջ գիտութեան ու կրթութեան զարգացման եւ այս մարզին մէջ երկու հայկական հանրապետութիւններու փոխադարձ գործակցութեան վերաբերող տարբեր հարցեր:

Հայաստանի կրթութեան եւ գիտութեան նախարարը երկօրեայ աշխատանքային այցելութեամբ Ղարաբաղ մեկնեցաւ նախանցեալ օր: Այցելութեան ծիրին մէջ ստորագրուեցաւ Հայաստանի եւ Լեռնային Ղարաբաղի կրթութեան եւ գիտութեան նախարարութիւններուն միջեւ կրթութեան եւ գիտութեան մարզին մէջ 2014-2020 թուականներու համագործակցութեան ծրագիր, ինչպէս կը հաղորդէ Հայաստանի կրթութեան եւ գիտութեան նախարարութեան լրատուական ծառայութիւնը:

ԱՆՆՄԱՆՈՒՄ

Հայ Եկեղեցւոյ Լուսապսակ Սուրբեր. Սուրբ Սահակ Պարթեւ Հայրապետ Լուսաւորիչ Միտքերու

Վռամշապուհի Որդի՝ Արտաշէս, Թագաւոր Հայոց

Սահակ կաթողիկոսի Վաղարշապատ հասնելէն ետք առաջին գործը եղաւ ազգային ընդհանուր ժողովի մը հրաւիրել հայ նախարարները, խորհրդակցելու՝ Հայաստանի թափուր մնացած գահին նոր թագաւոր մը բարձրացնելու մասին: Միաձայնութեամբ կ'որոշուի Արշակունեաց տոհմէն թագաւոր մը ունենալ. իսկ այդ նպատակի իրագործման համար Վռամշապուհի 18 տարեկան որդիէն զատ ուրիշ թեկնածու չկար: Անոնք կը յուսային, որ հայ թագաւորի մը իշխանութեան ներքոյ անիշխանութիւնը վերջ պիտի գտնէր եւ կարելի պիտի ըլլար առհասարակ երկրի խաղաղութիւնն ու բարօրութիւնը վերականգնել:



Ուստի հայ նախարարներու փափաքը կերպով արքայից արքայ Վռամին ներկայացնելու համար կ'ընտրուին Սմբատ Բագրատունի եւ Սահակ հայրապետի թոռը՝ Վարդան Մամիկոնեանը, որ իրենց հետեւորդներով մեկնին Պարսկաստան: Անոնք լիազօրուած էին փոխադարձ յարգանքի եւ վստահութեան մթնոլորտի մէջ Պարսկաստանի եւ Հայաստանի միջեւ բնական յարաբերութեանց նոր շրջան մը սկսիլ, սակայն այդ կարելի էր միայն մէկ յստակ նախապայմանի ընդունումով.- անցեալին պատահած թշնամական դէպքերը մոռացութեան պիտի տրուէին: Պիտի կնքուէր հաշտութեան նոր դաշինք մը, որուն հիման վրայ, Հայաստանի մէջ՝ Պարսկաստանի դէմ ըմբոստացած յանցաւորներ պիտի չփնտռուէին:

Վռամ սիրով ընդունելով հայ պատգամաւորները, իր ուրախութիւնը յայտնեց, որ իր բարի կամքը կատարուած էր,- անոնք ընդառաջելով իր ցանկութեան եկած էին խաղաղութեան դաշինք կնքելու: Ուստի, յօժարակամ ընդունեց անոնց պայմանները եւ առ այդ գրաւոր, կնքեալ խոստումնագիր մը տուաւ՝ մոռնալու անցեալին կատարուած «յանցանքներն ու յանցագործները»:

Ինչ կը վերաբերի **Արտաշէսին**, անոր անունը Սասանեան արմատներ ունեցող **Արտաշիրի** փոխելով, զայն հռչակեց հայոց թագաւոր: Այդ ժամանակ Արտաշէս հազիւ 18 տարեկան էր: Թէեւ ընդունուած կարգը այն էր, որ նման անչափահաս թագաւորներուն համար խնամակալներ կը նշանակուէին, սակայն Արտաշէսի պարագային պաշտօնապէս խնամակալ մը չնշանակուեցաւ, այլ բաւարար համարուեցաւ Սահակ կաթողիկոսին վստահիլ անոր վարք ու բարքին վերահասութիւնը եւ իր հայրական իմաստուն խորհուրդներով զայն առաջնորդելու բարոյական պարտականութիւնը:

Դժբախտաբար սակայն բարեհամբաւ Վռամշապուհի որդի (Արտաշիր դարձած) Արտաշէսը չարդարացուց իր վրայ դրուած յոյսերը: Ընդհակառակ անոր իգամով, զեղիս ու անատակ կեանքը պատճառ դարձաւ, որ զինք հայոց գահին բարձրացուցած նոյն նախարարները՝ չկարենալով հանդուրժել անոր զգուելի կենցաղին, աստիճանաբար հեռանան անկէ: Երիտասարդ թագաւորը ո՛չ գիտակցութիւնը ունէր իր վրայ դրուած պարտականութեանց եւ ո՛չ ալ կը լսէր Սահակ կաթողիկոսի հայրական յորդորները՝ սրբագրելու իր յոռի վարքագիծը:

ԿՈՐԻՆ ԱՐՔ. ՊԱՊԵԱՆ

ՄԻՋԱԶԳԱՅԻՆ

**Մեուտական Արաբիա, Արաբական Միացեալ
Էմիրութիւններ Եւ Պահրէյն Քաթարի Մէջ Իրենց
Ղեկավարները Տուն Կանչեցին**

Մեուտական Արաբիա, Արաբական Միացեալ Էմիրութիւններ Եւ Պահրէյն հրապարակեցին միացեալ հաղորդագրութիւն մը՝ յայտնելով, որ Քաթարի մէջ իրենց երկիրներու ղեկավարները տուն կը կանչեն:

Անոնք նշեցին, որ Ծոցի համագործակցութեան խորհուրդի անդամ երկիրները Քաթարի մօտ բոլոր մակարդակներու վրայ մեծ ջանք թափած են գոյացնելու համար համաձայնութիւն մը ընթացքի մը շուրջ, որ կ'երաշխաւորէ խորհուրդի անդամներուն ընթացքը միացեալ քաղաքական ծիրի մը մէջ, որ հիմնուած է խորհուրդի կանոնադրութեան եւ անդամ երկիրներուն միջեւ ստորագրուած համաձայնութեանց, որոնց շարքին՝ ապահովական համաձայնութեան, անդամ երկիրներէն որեւէ մէկուն ներքին հարցերուն ուղղակի կամ անուղղակի կերպով չմիջամտելու սկզբունքին, ապահովական գործունէութեան կամ քաղաքական ազդեցութեան փորձի ճամբով խորհուրդի անդամներուն ապահովութիւնը վտանգող կազմակերպութեանց կամ անհատներու աշխատանքին չաջակցելու, ինչպէս նաեւ թշնամական լրատուամիջոցներու չաջակցելուն վրայ:

Հաղորդագրութիւնը նշեց, որ հակառակ անոր որ այդ ջանքերը պսակուած են Քաթարի համաձայնութեան ապահովումով եւ Քաթարի իշխան շէյխ Թամիմ պըն Համատ Ալ Թանի ստորագրած է 23 նոյեմբեր 2013-ին Ռիատի մէջ գոյացած համաձայնութիւնը, սակայն Քաթար զայն չէ գործադրած: Համաձայնագիրի ստորագրութենէն երեք ամիս անցած է, սակայն Քաթար այդ համաձայնութեան գործադրութեան ուղղութեամբ անհրաժեշտ քայլեր չէ առած: 17 փետրուար 2014-ին Քուէյթի մէջ տեղի ունեցած ժողովին ընթացքին երեք երկիրներու արտաքին գործոց նախարարները հարցին կարեւորութիւնը շեշտած են, եւ ժողովի ընթացքին Ռիատի համաձայնութեան գործադրութեան հսկողութեան մեքանիզմի մը շուրջ համաձայնութիւն գոյացած է: Այդ ժողովին յաջորդած է 4 մարտ 2014-ին Ռիատի մէջ Ծոցի համագործակցութեան խորհուրդի արտաքին գործոց նախարարներու ժողովը, որուն ընթացքին մեծ ջանք թափուած է Ռիատի համաձայնութեան գործադրութեան քայլեր որդեգրելու կարեւորութեան համոզելու Քաթարը, սակայն այդ ջանքերը ձախողած են, ինչ որ երեք երկիրները մղած է որդեգրելու իրենց ապահովութիւնն ու կայունութիւնը պաշտպանելու անհրաժեշտ միջոցառումները, որոնց առաջինը մարտ 2014-էն սկսեալ իրենց ղեկավարները Քաթարէն տուն կանչելն է:

Մեուտական Արաբիա, Արաբական Միացեալ Էմիրութիւններ Եւ Պահրէյն յոյս յայտնեցին, որ Քաթար անմիջապէս կ'անսայ համաձայնութեան գործադրութեան կոչերուն, ինչպէս նաեւ Ծոցի համագործակցութեան խորհուրդը որեւէ պառակտումէ պաշտպանելու միջոցառումները կ'որդեգրէ:

Քաթարի, նախարարաց խորհուրդը ցաւ յայտնեց Մեուտական Արաբիոյ, Արաբական Միացեալ Էմիրութիւններու Եւ Պահրէյնի որոշումին համար՝ նշելով, որ իր ղեկավարները այդ երկիրներէն տուն կանչելով պիտի չհակադարձէ:

Նշենք, որ Քաթարի սակարանը 3 երկիրներու քայլէն ետք 3 առ հարիւրի անկում մը կրէց:

Ուքրանիոյ Տագնապ. Դիւանագիտութիւնը Թափ Կը Ստանայ

Ուքրանիոյ տագնապի լուծման դիւանագիտական ջանքերը երէկ թափ ստացան, երբ Միացեալ Նահանգներու արտաքին գործոց նախարար Ճոն Քերրի եւ Ռուսիոյ արտաքին գործոց նախարար Սերկէյ Լաւրով Փարիզի մէջ Լիբանանի օժանդակութեան շուրջ խորհրդաժողովին ծիրին մէջ հանդիպում մը ունեցան:

«Ռաշա Թուտէյ» հաղորդեց, որ երկու երկիրներու դիւանագիտութեան պետերը համաձայն են, որ պէտք է օժանդակել Ուքրանիոյ, որպէսզի գործադրէ 18 փետրուարի համաձայնութիւնը: Եւրոպական Միութեան արտաքին գործոց նախարարներու միջնորդութեամբ Ուքրանիոյ նախագահ Վիլքսոր Եանուքովիչի եւ ընդդիմութեան միջեւ գոյացած համաձայնութեան հիմամբ Ուքրանիոյ մէջ ազգային միութեան կառավարութիւն, նախագահական ընտրութիւն եւ 2004-ի սահմանադրութեան վերադարձ կը նախատեսուէր: Միացեալ Նահանգներ անմիջապէս հերքեցին, թէ Լաւրովի հետ այդպիսի համաձայնութիւն մը գոյացած է:

Աւելի ուշ, Ռուսիոյ, Միացեալ Նահանգներու եւ Բրիտանիոյ եւ Եւրոպական Միութեան անդամ այլ երկիրներու արտաքին գործոց նախարարներուն միջեւ քառակողմ հանդիպում մը տեղի ունեցաւ: Լաւրով հանդիպումէն հեռացաւ առանց Ուքրանիոյ արտաքին գործոց նախարարին հետ հանդիպում ունենալու եւ յայտնեց, որ հանդիպումները յառաջիկայ օրերուն պիտի շարունակուին:

Մինչ այդ, Եւրոպական Միութիւնը Ուքրանիոյ 11 միլիառ եւրոյի օժանդակութիւն առաջարկեց: Եւրոպական յանձնաժողովի նախագահ Խոսէ Մանուէլ Պարոսո յայտնեց, որ յառաջիկայ երկու տարուան համար նախատեսուած վարկերու եւ փոխատուութեան թղթածրարը «ծրագրուած է օժանդակելու համար (Քիւեյ մէջ) յանձնառու, բոլորը ներառող եւ բարեփոխումներ կատարելու ուղղուածութիւն ունեցող կառավարութեան մը»: Ուքրանիոյ էլեւմուտքի նախարարութեան նախատեսութեամբ տնտեսութեան փրկութեան համար կարիքը կայ 35 միլիառ տոլարի:

Այլ զարգացումներու ծիրին մէջ երէկ Արեւելեան Ուքրանիոյ Տոնեցք քաղաքի տեղական կառավարութեան շէնքէն վար առնուեցաւ հինգ օր առաջ այդտեղ բարձրացուած Ռուսիոյ դրօշը եւ անոր տեղ անգամ մը եւս բարձրացաւ Ուքրանիոյ դրօշը: Խրիմի մէջ զինեալներ ՄԱԿ-ի ընդհանուր քարտուղարի ներկայացուցիչ Ռոպըրթ Մերրին պատանդ բռնեցին եւ անոր սպառնացին, սակայն հետագային զինք ազատ արձակեցին:

Ըստ չհաստատուած տեղեկութեանց, ռուսական ուժեր Խրիմի մէջ գրաւած են ուքրանական հակաօդային պաշտպանութեան երկու դիրքեր:

«ՌԻԱ Նովոսթի» հաղորդեց, որ Ռուսիոյ Դաշնակցային խորհուրդը սկսած է օրինագիծի մը նախապատրաստումը, ըստ որուն ռուսական իշխանութիւնները պիտի կարենան ամերիկեան եւ եւրոպական ընկերութիւններէն, ներառեալ՝ սեփական ընկերութիւններէն բռնագրաւել կալուածներն ու դրամատնային հաշիւները: Օրինագիծը պատրաստուած է ի պատասխան Միացեալ Նահանգներու եւ Եւրոպական Միութեան խոստացած պատժամիջոցներուն:

Խրիմի վարչապետ Սերկէյ Աքսիոնով յայտնեց, որ ինքնավար հանրապետութեան ղեկավարութիւնը ներկայիս պատրաստ չէ Քիւեյի հետ բանակցելու, որովհետեւ ներկայ իշխանութիւնները ապօրինի կը նկատէ:

Ռուսիա Հայաստանի Իր Ռազմակայանը Համալրած Է Կատարելագործուած «Միկ-29»-երով

«ՌԻԱ Նովոսթի»՝ վկայակոչելով Ռուսիոյ Հարաւային զինուորական շրջանի գնդապետ Իկոր Կորպուլի խօսքերը, կը հաղորդէ, որ Ռուսիա Հայաստանի մէջ իր ռազմակայանը համալրած է խումբ մը կատարելագործուած «Միկ-29»-երով:



Նախապէս «Էրեբունի» օդակայանի 3624-րդ օդուծի ռազմակայանը առնուազն 16 «Միկ-29 Ֆուլքրում» կործանիչներ ունեցած է, սակայն այս անգամ խօսքը 4-րդ սերունդի «Միկ-29» բազմաթիւ առաքելութիւններ կատարելու կարող, կատարելագործուած կործանիչներու մասին է, սակայն անոնց թիւը չի նշուիր:

Նախապէս ռուս զինուորականները յայտնած էին, որ ռազմակայանը պիտի համալրուի առնուազն 18 զինուորական փոխադրութեան եւ յարձակողական ուղղաթիւներով:

ուղղաթիւներով:

Կիւլ. «Թուրքիա Ուքրանիոյ Տարածքային Ամբողջականութեան Կ'աջակցի»

Թրքական «Թ.Ռէ.Թէ. Հապեր» կայքը կը հաղորդէ, որ Թուրքիոյ նախագահ Ապտիլլա Կիւլ Անգարայի մէջ Լեհաստանի նախագահ Պրոնիսլաւ Քոմորովսքիի հետ տուած միացեալ մամլոյ ասուլիսին ընթացքին յայտարարած է, որ Թուրքիան կ'աջակցի Ուքրանիոյ տարածքային ամբողջականութեան: Ան յայտարարած է, որ Թուրքիան կը հետեւի Ուքրանիոյ մէջ իրադարձութիւններու զարգացումներուն:



Կայքը նաեւ կը հաղորդէ, որ Թուրքիոյ վարչապետ Ռեճեփ Թայիփ Էրտողան եւ Ռուսիոյ նախագահ Վլատիմիր Փութին 4 մարտին թրքական կողմի նախաձեռնութեամբ հեռաձայնային զրոյց մը ունեցած են: Էրտողան Փութինի ըսած է. «Ուքրանիոյ մէջ գոյութիւն ունեցող ճգնաժամի կարգաւորումը ուքրանացիներու գործն է»: Ըստ անոր, Ուքրանիոյ մէջ անկայունութիւնը բացասաբար պիտի ազդէ ամբողջ շրջանին վրայ:

Ըստ Քրեմլինի պաշտօնական կայքին, Փութին եւ Էրտողան քննարկած են Ուքրանիոյ մէջ, մասնաւորաբար Խրիմի մէջ տիրող իրավիճակը: Ըստ կայքին. «Երկու կողմերն ալ համոզում յայտնած են, որ հակառակ Մայտանի արմատական եւ ծայրայեղական ուժերու գործողութիւններուն, Խրիմի մէջ պիտի յաջողուի հաստատել միջարանուանական եւ ազգամիջեան խաղաղութիւն ու հանգստութիւն»:

ԼՈՒՐԵՐ ԳԱՂՈՒԹՆԵՐԷՆ

Հալէպ

«Տարեցներու Տարի» Հոչակման Մասին Դասախօսութիւն



Կազմակերպութեամբ Համազգայինի Հալէպի «Ն. Աղբալեան» մասնաճիւղի գրական յանձնախումբին, ուրբաթ, 28 փետրուար 2014-ին՝ կէսօրէ ետք ժամը 4:00-ին, Ս. Աստուածածին եկեղեցոյ ներքնասրահին մէջ տեղի ունեցաւ դասախօսական երեկոյ մը:

Ըստ «Բերիոյ նիւզ»-ի տեղեկութիւններուն, դասախօսութեան նիւթը Մեծի Տանն Կիլիկիոյ Արամ Ա. կաթողիկոսին կողմէ 2014 տարին «Տարեցներու տարի» յայտարարելու մասին էր:

Դասախօսն էր Բերիոյ Հայոց թեմի առաջնորդ Շահան արք. Սարգիսեանը:

Ներկայ էին Հալէպի մէջ Հայաստանի գլխաւոր հիւպատոս Կարէն Գրիգորեան, Բերիոյ Թեմի Ազգային վարչութենէն ներկայացուցիչ մը, Համազգայինի Շրջանային վարչութեան անդամներ, մշակութային, բարեսիրական, մարզական եւ հայրենակցական միութիւններու անդամներ եւ հոգեւոր հայրեր:

Հանդիսութեան բացումը կատարեց Պէթի Քիլերճեան, որ նախ Համազգայինի անունով շնորհաւորեց Շահան արք. Սարգիսեանը՝ Արքութեան տիտղոս ստանալուն համար, ապա անդրադարձաւ օրուան նիւթին կարեւորութեան:

Բացման խօսքէն ետք Մեղրի Պազգարեան եւ Գէորգ Գատէհճեան ասմունքեցին Ժաք Յակոբեանի «Մեր մայրերը» եւ «Մեր հայրերը» բանաստեղծութիւնները:

Անկէ ետք սրբազան հայրը նախ ներկայացուց վեհափառ հայրապետի հոչակագիրի բովանդակութեան հիմնական չորս ենթախորագիրները.

ա.- «Տարեցները Աստուածաշունչին մէջ»:

բ.- «Տարեցները եկեղեցոյ կեանքին մէջ»:

գ.- «Յարգել եւ խնամել տարեցները»:

դ.- «Ներկայ տարին «Տարեցներու տարի»»: հոչակելով կ'ուզենք հայրապետական մեր բարձր գնահատանքը յայտնել տարեց սերունդին օգտակար հանդիսացող մեր բոլոր միութիւններուն, բարերարներուն, խնամակալութիւններուն, բժիշկներուն ու բուժքոյրերուն»:

Ապա սրբազանը հանգամանօրէն մանրամասնեց իւրաքանչիւր գլուխ՝ պարզելով Արամ Ա. կաթողիկոսին պատգամը:

Շահան արք. Սարգիսեան, տարեց, երեց եւ աւագ բառերուն իմաստը բացատրելէ ետք ընդգծեց, որ մեր ժողովուրդը բարձրագոյն աստիճանի հոգածութիւն, սէր, խնամք ու յարգանք պէտք է ցուցաբերէ իր տարեց սերունդին նկատմամբ՝ աւելցնելով, որ անհրաժեշտ է յարգել տարեցները:

Ան շեշտեց, թե աստուածային պատուիրան է տարեցները յարգելը. ան նաև մարդկային կեանքի հիմնական օրենքն է: Տարեցները պետք է յարգել երկար տարիներ իրենց կատարած ծառայութեան, վաստակած փորձառութեան ու ձեռք ձգած իմաստութեան համար: Տարեցները պետք է յարգել անոնց հետ մեր մշակած յարաբերութեան ճամբով ու երբ կը գտնուինք անոնց ներկայութեան: Տարեցները հարկ է յարգել մեր առօրեայ կեանքին ընթացքին՝ սիրոյ ու գուրգուրանքի յատուկ վերաբերում ունենալով անոնց նկատմամբ:

Վերջապէս, անհրաժեշտ է լսել տարեցները: Ընդհանրապէս մեր կեանքին մէջ հակամէտ ենք խօսելու, թելադրելու, հրահանգելու: Լսելը ինքնավստահութիւն կը ներշնչէ եւ իմաստութեան կ'առաջնորդէ մարդը: Ճիշդ բաներ լսելու համար անհրաժեշտ է դառնալ տարիներու ընթացքին փորձառութիւն ձեռք ձգած տարեցներուն՝ անոնց կեանքէն քաղուած օրինակները, դրական կամ ժխտական, մեր կեանքին մէջ ունենալու ու մեր կեանքին ուղեցոյցը դարձնելու:


Դասախօսութեան ւարտին սրբազան հայրը յատկապէս ընդգծեց, որ Հայոց ցեղասպանութեան 100-ամեակի սեմին տարեցներուն յաւելեալ կարեւորութիւն պետք է տալ՝ իբրեւ վկայութիւն, որակելով զանոնք ԱՊՐՈՂ ՎԿԱՆԵՐ:

Վերոնշեալ խորագիրները լայն իմաստով, ինչպէս նաև Աստուածաշունչէն օրինակներ բերելով սրբազան հայրը շուրջ մէկ ժամ տեւողութեամբ անդրադարձաւ վեհափառ հայրապետի հռչակագիրի բովանդակութեան:

Հանդիսութիւնը իր ւարտին հասաւ սրբազան հօր պահպանիչով ու խաղաղութեան ողջոյնի օրհնութեամբ:

Եզիպտոս

Դեսպան Մելքոնեանին Հանդիպումը Եզիպտոսի Քաղաքացիական Օդանաւորութեան Նախարարին Հետ



Եզիպտոսի մէջ Հայաստանի դեսպան Արմէն Մելքոնեան հանդիպում ունեցաւ Եզիպտոսի քաղաքացիական օդանաւորութեան նախարար Ապտելազիզ Ֆատելի հետ: Հանդիպման ընթացքին քննարկուեցան երկու երկիրներու միջեւ փոխշահաւէտ համագործակցութեան հնարաւորութիւնները, ինչպէս նաև՝ Երեւանի եւ Գահիրէի միջեւ կանոնաւոր փոխադրութիւններ հաստատելու հեռանկարները:

Դեսպան Մելքոնեան նախարարին տեղեկացուց «Բաց երկինքի» քաղաքականութիւնը որդեգրելու Հայաստանի կառավարութեան որոշման մասին եւ յոյս յայտնեց, որ ան կը նպաստէ երկու մայրաքաղաքները օդային կամուրջով իրարու կապելու վաղեմի ծրագրի իրականացման՝ եզիպտական օդանաւային ընկերութիւններու դիմաց լայն հնարաւորութիւններ ստեղծելով Երեւանի տարանցիկ առաւելութիւններէն օգտուելու համար:

Պուկարիա Եւ Ռումանիա

Պուկարիոյ Եւ Ռումանիոյ Հայոց Թեմերը Միասին Մեծ Շուքով Նշեցին Ղեւոնդեանց Քահանաներու Տօնը



Այս տարի Պուկարիոյ հայոց թեմի պատմութեան մէջ առաջին անգամ ըլլալով նշուեցաւ Սուրբ Ղեւոնդեանց քահանաներու տօնը եւ Եւրոպայի մէջ առաջին անգամ երկու տարբեր թեմեր՝ Պուկարիա եւ Ռումանիա միասին տօնեցին զայն:

Ռուսէի Ս. Աստուածածին եկեղեցոյ մէջ մատուցուեցաւ Ս. պատարագ. Ռումանիոյ հայոց թեմի առաջնորդ Տաթև եպս. Յակոբեան իր քարոզին մէջ շնորհաւորեց բոլոր քահանաները՝ շեշտելով անոնց դերը

համայնքի կեանքին մէջ:

Պատարագի աւարտին սրբազանը կատարեց նաեւ դպրական տուչութիւն, ինչպէս նաեւ Ամենայն Հայոց կաթողիկոս Գարեգին Բ.-ի տնօրինութեամբ քահանայական լանջախաչ կրելու իրաւունք ստացաւ Փլովտիվի հոգեւոր հովիւ Հրաչ քինյ. Սուրբատեան:

Պարսելոնա

Մայրենի Լեզուի Միջազգային Օրուան Նշում



Շաբաթ, 22 փետրուար 2014-ին Պարսելոնայի Հայկական մշակութային միութեան Միօրեայ վարժարանը նշեց Մայրենի լեզուի միջազգային օրը: Վարժարանի ուսուցիչները ներկայացուցին Գալուստ Կիւլպէնկեանի, Արշիլ



Կորքիի, Յովհաննէս Թումանեանի եւ Սիամանթոյի կենսագրութիւններն ու կատարած աշխատանքները: Ձեռնարկի ընթացքին վարժարանի սաները հարցումներով փորձեցին աւելին գիտնալ հայ բարերարին ու մտաւորականներուն մասին:

Աւարտին ցուցադրուեցաւ հայոց լեզուի մասին փաստագրական տեսերիզ մը:

Հայ լեզուն տունն է հայուն

ՀՈԳԵՒՈՐԱԿԱՆԻՆ ԱՆԿԻՆԸ

ԱՍՏՈՒԾՈՅ ՊԱՏԿԵՐԸ ՄԱՐԴՈՒՆ ՄԷՋ

Աստուծաշունչը կ'ըստ, որ Աստուած իր պատկերով ստեղծեց մարդը: Մուրբ գիրքին այս տողը դարեր ամբողջ եկեղեցոյ հայրերու գրականութեան էջերը լեցուցած է, ու այլաբանական մեկնաբանութեան ճամբով քարոզախօսութեան սքանչելի նիւթ մատակարարած հոգեւոր հայրերուն: Աստուած դիմագիծ ունի: Չէ՞ որ այնքան կը քարոզուի անոր հոգեղէն գոյութեամբ գերագոյն էակ մ'ըլլալուն մասին: Ինչպէ՞ս կրնայ ըլլալ որ ֆիզիքական դիմագիծ ունեցող էակ մը հաւասարապէս ներկայ ըլլայ ամենուրեք: Կամ՝ «ամենատես», «ամենագէտ», «ամենահաս», «ամենակարող» ստորոգելիները ինչպէ՞ս կարելի է տալ էակի մը, որուն պատկերին մասին կը խօսուի եւ որուն նմանութիւնը ունինք մենք՝ իր պատկերով ստեղծուածներս, համաձայն իր ներշնչումով գրուած սուրբ գիրքին: Ահաւասիկ հաւատացեալ մարդուն միտքին առջեւ ծառացող հարց մը, որուն լուծումը դիւրին ըլլալուն հետ միատեղ, հիմնաւոր օրինակներու կը կարօտի, համոզիչ հանգամանք մը ստանալու համար:



Աստուած աննիւթ գոյութիւն մըն է: Աստուծոյ ինքնայնութիւնը եղող մատեանը այդպէս կը հաստատէ, սակայն Անոր գոյացութեան ֆիզիքական պատկերը մարմնաւորուած է մարդ էակին հոգեկան եւ ֆիզիքական պատկերներուն մէջ հաւասարապէս: Բացատրե՛նք: Մենք իբրեւ մարդ արարածներ կամա՛ւ թէ ակամայ, ստեղծարար գերագոյն ուժէն կախումնաւոր վիճակ մը ունինք: Ուրիշ անունով՝ Աստուծմէ՛ կախեալ ենք, նկատի ունենալով մարդկային մեր սահմանափակ կարողութիւնները: Կրնանք չհաւատալ, սակայն չե՛նք կրնար ուրանալ:

Այս կախումնաւորութեամբ բացատրուող Աստուծոյ մեր նմանութիւնը շարունակական ընթացք մըն է սերունդէ սերունդ փոխանցուող: Իրենց կարգին՝ մեր զաւակները եւս կախումնաւորութիւն ունին մեզմէ:

Արդի մանկավարժութիւնը ծնողքի մը վրայ կը դնէ դաստիարակչական ծանրագոյն պատասխանատուութիւնները, իսկ քրիստոնէական դաստիարակութիւնը անոր կը յանձնէ իրենց նմանութիւնը եղող զաւակին դիմաց Աստուծոյ՝ նմանութիւնը դառնալու մեծ պարտականութիւնը...:

Ահա թէ ի՛նչ իմաստ ունի «Աստուծոյ նմանութիւնը ըլլալ»ը այս կեանքին մէջ, մեզմէ կախումնաւոր եղող անձերուն դիմաց կերտելով այն պատկերը, որուն հարազատ հայելիացումը պէտք է ըլլանք անտարակոյս:

Անչափահաս տարիքի մէջ գտնուող երեխաներուն համար ամէ՛ն ինչ են իրենց ծնողները: Անոնք ո՛չ միայն խնամատար են, կերակուր հայթայթող են կամ հագուստ կապուստ ապահովող մարդիկ, այլ մանաւանդ՝ «ամենակարող», բառին մանկական հասկացողութեամբ: Մանուկ մը իր հայրը հերոս մը կը տեսնէ ու այդպէս ալ կը ներկայացնէ իր հասակակիցներուն, իսկ մօրը կը նայի, իբրեւ իր բոլոր դժուարութեանց լուծում բերող հանձարի մը: Տեսնուած է, որ նոյնիսկ երիտասարդութեան տարիքը թեւակոխած տղաք ու աղջիկներ, տան մէջ կորսուած իրենց մէկ առարկան փնտռելէ յոգնած՝ իրենց մօրը կը դիմեն, որպէսզի գտնէ ու իրենց վերադարձնէ: Ասիկա կ'ենն ո՛չ այնքան անոր համար որ մայրը մնայուն կերպով տան մէջ է ու իբրեւ

տանտիկին կրնա՛յ գիտնալ ո՞ր ինչ բան դրուած է, այլ՝ որովհետեւ բնազդաբար կը տարուին մտածելու, որ ան պէ՛տք է գիտնայ ամէն բան: Ինչքա՛ն կը յուսահատին զաւակներ երբ յանկարծ մայրը ըսէ. «չէ՛ մ գիտեր ո՞ր դրած ես: Առարկաներուդ տէ՛ր պէտք է ըլլաս»:

Մանուկը անգիտակցաբար կը սպասէ որ ամէն ինչ իրեն մատուցուի հեզասահ կերպով: Ան կ'ուզէ որ առանց խոչընդոտներու ընթանայ իր կեանքը եւ իւրաքանչիւր դժուարութեան պատճառը իր ծնողներուն մէջ կը տեսնէ՝ իր զայրոյթը անոնց վրայ թափելով, նոյնիսկ եթէ ծնողները ո՛չ մէկ պատասխանատւութիւն ունին պատահած դէպքին մէջ: Նոյնը չէ՞ պարագան չափահաս մարդոց, որոնք յատկապէս ամէն ձախորդութեան պատճառը կը տեսնեն Աստուծոյ մէջ ու տկար մարդու յատուկ մոլուցքով մը իրենց զայրոյթը ապերախտութեամբ կը շարտեն Անոր երեսն ի վեր: Իսկ իրենց յաջողութիւններուն մէջ բնա՛ւ տրամադիր չեն ըլլար յիշելու Աստուած՝ բարեաց աղբիւրը: Մինչ մանուկներ իրենց կանխահաս տարիքէն ծնողներու բերնէն կը սորվին շնորհակալութիւն յայտնել անոնց, որոնք նոյնիսկ գաւաթ մը ջուր կը մատուցեն իրենց:

Մանուկներուն դիմաց Աստուծոյ պատկերը ըլլալու մարտահրաւերը հնութիւն չի ճանչցող ընթացքով մը սերունդէ սերունդ փոխանցուող պարտականութեանց շղթայ մըն է, մեծ պատասխանատուութիւն ենթադրող: Նման գիտակցութեան գալէ ետք, այն ինչ որ կ'ընէիր իբրեւ սխալ՝ պարտիս չընել զաւակիդ դիմաց, որովհետեւ Աստուած այդ ձեւով չի՛ վարուիր քեզի հետ: Հետեւաբար, Աստուծոյ նմանելու մեր այս ճիգը միաժամանակ ինքնադաստիարակութեան հրաշալի պատեհութիւն մը կը ստեղծէ մեր կեանքին մէջ:

Ներողամտութեան զգացումը յարմարագոյն երեւոյթներէն մին է մեզ Աստուծոյ նմանեցնող: Մենք խորապէս կ'ուզենք որ Աստուած ներող ըլլայ մեզի մեր բոլոր յանցանքներուն համար: Նոյնիսկ ամէնէն ծանրագոյններուն կամ մեր «մահացու մեղք»երուն համար Անկէ ներում կը խնդրենք: Ինչո՞ւ պիտի չկարենանք ուրեմն, նոյն ոգիով ներել մեր զաւակներուն, երբեմն անոնց անգիտակցաբար գործած մեղքերուն համար: Ներողամտութեան զգացումը Աստուծոյ կողմէ մեր մէջ դրուած ամէնէն թանկագին հայելին է, որուն մէջէն իր պատկերը կ'արտացոլայ...:

Մանուկներուն հետ աղօթելու երեւոյթը եւս Աստուծոյ պատկերին նմանելու նշանակութիւն կ'ունենայ մեր կեանքին մէջ: Աղօթքի ճամբով Աստուծոյ հետ կը հաղորդուինք՝ ուժի մը ակնկալիքով որ կրնայ փոփոխութիւն բերել մեր կեանքին: Իր անկողնին մէջ ծունկի եկած մանուկին աղօթքը աւելի՛ ինքնավստահ կ'լլայ ու աւելի՛ գորեղ կերպով սլաքուած առ Աստուծոյ, երբ ան տեսնէ որ իր ծնողքը եւս իր հետ կ'աղօթէ նոյնպէս ծունկի եկաւ: Դուն պիտի չ'ուզէի՞ր որ Աստուած քեզի հետ ըլլար ու լսեր քեզ ջերմեռանդն աղօթած պահուդ: Մանուկին աղօթած պահուն անոր կողքին ներկայութիւնդ ու աղօթքդ՝ Աստուծոյ մարմնացումն է անոր դիմաց, իր ննջարանի՛ն մէջ, ճի՛շդ իր անկողնին վրայ...: Մէկը՝ որ ճի՛շդ այդ պահուն ո՛չ միայն կը լսէ զինք, այլ՝ իր հետ կ'աղօթէ ու վստահութիւն կը ներշնչէ իրեն...:

Աստուծոյ պատկերին համաձայն ստեղծուած ես, այո՛, սակայն կրնաս նաեւ նմանիլ Անոր, Աստուծոյ մարմնացեալ որինակը դառնալով իր վստահութիւնը անձիդ մէջ դրած մանուկին դիմաց:

Բարոյական դաստիարակութիւնը մանուկ տարիքէն կը սկսի: «Ծուռ ծառը» շտկելը անյոյս կերպով ժամանակդ պիտի վատնէ ապագային:

Գրիգոր Ծ. Վրդ. Զիֆթճեան



ՅԱՅՏԱՐԱՐՈՒԹԻՒՆ

Հայոց ցեղասպանության մինչև այսօր շարունակուող ողբերգություններին մեկն այ՛ Արեւմտեան Հայաստանի եւ Թուրքիոյ մէջ վերապրող, իսլամացած հայութիւնն է: Այս խնդիրը երկար ժամանակ ոչ միայն չէր քննարկուեր, այլ նոյնիսկ հանրութեանը ծանօթ չէր:

Այս երեւոյթը ուսումնասիրելու համար անհրաժեշտ է գտնել հետեւեալ հարցումներուն պատասխանները. -

- 1- Ինչո՞ւ եւ ի՞նչ գործօններու ազդեցութեան տակ իսլամացան այս Հայերը:
 - 2- Արդե՞օք անոնք այսօր ունին իրենց ազգային ինքնութեան վերադառնալու հնարաւորութիւն:
 - 3- Ինչպե՞ս կը վերաբերին Թուրքիան, գիտական շրջանակները եւ հասարակութիւնը հայութեան այս զանգուածին հետ:
- Այս եւ նման հարցադրումներու պատասխանը գտնելու համար՝

Հովանաւորութեամբ Գերպ. Տ. Մասիս Ծ. Վրդ. Զօպուլեանի

Քուէյթի Հայ Դատի Յանձնախումբը
Միրով կը հրաւիրէ ձեզ
Մտքերու փոխանակման հետեւեալ թեմայի շուրջ

ԹՈՒՐՔԻՈՅ «ԿՈՐՍՈՒԱԾ ՀԱՅԵՐԸ»

- Տեսահոլովակի ցուցադրութիւն
- Սահիկներով նիւթի ներկայացում եւ
- Մտքերի փոխանակում – զրոյց

Տեղի կ'ունենայ Ուրբաթ, 14 Մարտ 2014-ին,
Երեկոյեան ժամը 7:00-ին, Սրբոց Վարդանանց Եկեղեցոյ մէջ:

ՅԱՅՏԱՐԱՐՈՒԹԻՒՆ

Հովանավորությամբ
Գերպ. Տ. Մասիս Ծ. Վրդ. Զօպույեանի

Կազմակերպությամբ
Ազգային Վարչության



«ԴԱՍԱԿԱՆ ԵՐԱԺՇՏՈՒԹԵԱՆ ԵՐԵԿՈՅ»

Մասնկացությամբ
«ԿՈՄԻՏԱՍ»Ի անուան Քուսերվաթորիայի Շրջանաւարտ
Հայրենի վոկալիստ

Տիկին Լենա Տէմիրճեանի

Պրն. Շանթ Դանիէլեանի (ջութակ)
Տիկին Հայկուհի Կիրակոսեան- Բազեանի (դաշնամուր)
Տիկին Թամար Դանիէլեան- Թէմամեանի (ջութակ)

Տեղի պիտի ունենայ
Ուրբաթ, 28 Մարտ 2014ին, دار الآثار الإسلاميةի սրահին մէջ:
Հասցէ՝.- Պաղտատ փողոց, Ապտալլա Ալ Սալէմ դպրոցի կից: